



REPUBLIKA E SHQIPËRISË

**KOMISIONERI PËR TË DREJTËN E INFORMIMIT DHE  
MBROJTJEN E TË DHËNAVE PERSONALE  
DREJTORIA PËR MBROJTJEN E TË DHËNAVE PERSONALE**

Nr. 316/3 prot.

Tiranë më 6.03.2019

**REKOMANDIM**

Nr. 20, datë 6.03.2019

**PËR KONTROLLUESIN “KOMISIONI I PROKURIMIT PUBLIK”**

Në mbështetje të neneve 29, 30, 31 a/1 dhe 32 të ligjit nr. 9887 datë 10.03.2008 “Për Mbrojtjen e të Dhënave Personale” i ndryshuar, neneve 77-112 të ligjit nr.44/2015 “Kodi i Procedurave Administrative të Republikës së Shqipërisë”, si dhe provave të administruara në ngarkim të kontrolluesit “Komisioni i Prokurimit Publik”.

**KONSTATOVA SE:**

Në zbatim të Urdhrit nr.67 datë 22.02.2019 të Komisionerit për të Drejtën e Informimit dhe Mbrojtjen e të Dhënave Personale, u krye hetimi administrativ pranë kontrolluesit “Komisioni i Prokurimit Publik”, me objekt:

- Zbatimi i neneve 18 dhe 21 të ligjit nr. 9887/2008 “Për Mbrojtjen e të Dhënave Personale” i ndryshuar, dhe akteve të miratuara nga Komisioneri në lidhje me mbledhjen, përpunimin, ruajtjen dhe sigurinë e të dhënave personale, gjatë kryerjes së aktivitetit nga kontrolluesi “Komisioni i Prokurimit Publik”.

Komisioni i Prokurimit Publik është person juridik publik, i pavarur. Komisioni shqyrton ankesat për procedurat e prokurimit në cilësinë e organit më të lartë në fushën e prokurimeve.

Nga verifikimi i kryer në vend, rezultoi se:

1. Kontrolluesi nuk ka “Njoftuar” Zyrën e Komisionerit në lidhje me përpunimin e të dhënave personale, në zbatim të nenit 21 të ligjit nr. 9887/2008 “Për mbrojtjen e të dhënave personale” i ndryshuar.

“Njoftimi” mbi përpunimin e të dhënave personale për të cilat kontrolluesi është përgjegjës, është i rëndësishëm pasi u jep mundësinë subjekteve të të dhënave që të informohen mbi kategorinë e të dhënave që përpunohen, qëllimin e përpunimit të tyre, realizimin e detyrimeve ligjore nga ana e kontrolluesit etj.

Konstatimi përbën shkelje administrative të pikës 1, të nenit 21, të ligjit nr.9887/2008 *"Për mbrojtjen e të dhënave personale"* i ndryshuar: *"Çdo kontrollues duhet të njoftojë Komisionerin për përpunimin e të dhënave personale, për të cilat është përgjegjës. Njoftimi duhet të bëhet para se kontrolluesi të përpunojë të dhënat për herë të parë ose kur kërkohet ndryshimi i gjendjes së njoftimit të përpunimit, sipas nenit 22 të këtij ligji"*.

2. Kontrolluesi nuk ka vendosur *"Politikën e Privatësisë"* në faqen zyrtare [www.kpp.gov.al](http://www.kpp.gov.al), me qëllim informimin e subjekteve të të dhënave të cilët aksesojnë dhe ngarkojnë të dhëna personale. Informacioni i publikuar në *"Politikën e Privatësisë"*, duhet të ketë për qëllim informimin e subjekteve të të dhënave që vizitojnë këtë faqe mbi mënyrat e përpunimit të të dhënave, masat e sigurisë, ruajtjen e konfidencialitetit, të drejtat e subjekteve të të dhënave dhe detyrimet e kontrolluesit në kuadër të mbrojtjes së privatësisë.

Çdo kontrollues që përpunon të dhëna personale, pavarësisht faktit nëse përpunimi bëhet në mënyrë elektronike apo manuale, dhe pavarësisht faktit nëse mbledh apo jo të dhëna personale nëpërmjet faqes zyrtare, ka detyrimin që të publikojë *"Politikën e Privatësisë"*, pasi kontakti paraprak i çdo subjekti të dhënash me kontrolluesin realizohet nëpërmjet faqes online në internet.

Zyra e Komisionerit vlerëson se mungesa e një rubrike të veçantë për *"Politikën e Privatësisë"* në faqen zyrtare të Kontrolluesit, privon subjektet e të dhënave personale nga e drejta për informim, sipas parashikimeve të nenit 18 dhe të drejtat e parashikuara në Kreun IV *"Të drejtat e subjektit të të dhënave"*, të ligjit nr.9887/2008 *"Për mbrojtjen e të dhënave personale"* i ndryshuar, duke mos u dhënë mundësi në ushtrimin e tyre dhe duke i cënuar ato.

Konstatimi përbën shkelje administrative të pikës 1, të nenit 18, të ligjit: *Kontrolluesi, kur mbledh të dhëna personale, duhet të informojë subjektin e të dhënave për fushën dhe qëllimin, për të cilin do të përpunohen të dhënat personale...*" dhe Vendimit nr.6/2013 *"Për përcaktimin e rregullave të hollësishme për sigurimin e të dhënave personale"*.

3. Kontrolluesi disponon një sistem video - survejimi (CCTV) qëllimi i të cilit është garantimi i sigurisë në ambientet e punës. Kontrolluesi nuk informon subjektet e të dhënave *"nëpunës"*, *"vizitorë"* etj., mbi prezencën e këtij sistemi, përpunimin e të dhënave imazhe-video, të drejtat e subjekteve të të dhënave në rast cënimit të privatësisë, etj.

Zyra e Komisionerit vëren se, mungesa e informimit të subjekteve të të dhënave lidhur me mbikëqyrjen e ambienteve nëpërmjet sistemit të video-survejitimit (CCTV), përbën shkelje administrative të pikës 1, të nenit 18, të ligjit: *"Kontrolluesi, kur mbledh të dhëna personale, duhet të informojë subjektin e të dhënave për fushën dhe qëllimin, për të cilin do të përpunohen ..."* dhe Udhëzimit nr.3/2010 të Komisionerit *"Për përpunimin e të dhënave personale me sistemin e video survejitimit..."*.

Në përfundim të hetimit administrativ, referuar provave dhe konstatimeve në vend, grupi i kontrollit hartoi dhe nënshkroi në prani të palëve procesverbalin e hetimit administrativ.

Lidhur me konstatimet e grupit të hetimit administrativ, përfaqësuesit e Kontrolluesit nuk patën kundërshtime, por kërkuan kohë për plotësimin e detyrimeve ligjore.

Sa më sipër, në zbatim të neneve 18, 21, 22, 29, 30, 31 dhe 32 pika 1 të ligjit nr. 9887/2008 "Për mbrojtjen e të dhënave personale" i ndryshuar,

#### REKOMANDOJ:

1. Kontrolluesi "Komisioni i Prokurimit Publik", në zbatim të nenit 21 të ligjit nr.9887/2008 "Për Mbrojtjen e të Dhënave Personale" i ndryshuar, të kryejë "Njoftimin" pranë Zyrës së Komisionerit, mbi përpunimin e të dhënave personale për të cilat është përgjegjës.
2. Kontrolluesi "Komisioni i Prokurimit Publik", në zbatim të nenit 18 të ligjit nr.9887/2008 "Për Mbrojtjen e të Dhënave Personale" i ndryshuar, të informojë subjektet e të dhënave mbi përpunimin e të dhënave personale, qëllimin e përpunimit, mjetet dhe mënyrat e përpunimit, përhapjen e të dhënave etj., nëpërmjet "Politikës së Privatësisë" në faqen zyrtare <http://www.kpp.gov.al>.
3. Kontrolluesi "Komisioni i Prokurimit Publik" në zbatim të nenit 18 të ligjit nr.9887/2008 "Për Mbrojtjen e të Dhënave Personale" i ndryshuar, të informojë subjektet e të dhënave mbi prezencën e sistemit të video-survejimit (CCTV), sipas standardit të parashikuar në Udhëzimit nr.3/2010 të Komisionerit "Për përpunimin e të dhënave personale me sistemin e video survejimit në ndërtesa dhe mjedise të tjera".
4. Kontrolluesi "Komisioni i Prokurimit Publik", të kryejë të gjitha detyrimet që burojnë nga ligji dhe nga ky akt, brenda një afati 10 ditor nga momenti i marrjes dijeni dhe të njoftojë me shkrim Zyrën e Komisionerit për masat e marra. Përmbyshja e këtyre detyrimeve nga kontrolluesi, përbën objekt kontrolli të vazhdueshëm nga Zyra e Komisionerit.
5. Në rast mos përmbyshje të detyrimeve të caktuara, Komisioneri vepron sipas nenit 30/2 dhe 39 të ligjit nr. 9887/2008 "Për Mbrojtjen e të Dhënave Personale" i ndryshuar. Komisioneri në rast shkeljesh serioze, të përsëritura ose të qëllimshme të ligjit nga një kontrollues ose përpunues, veçanërisht në rastet e përsëritura të moszbatimit të Rekomandimeve të tij, vendos sanksion me gjobë për kundërvajtjet administrative dhe e denoncon publikisht ose e raporton çështjen në Kuvend dhe në Këshillin e Ministrave.

Ky Rekomandim u shpall sot më datë 6.03.2019.

KOMISIONERI

Besnik Dervishi

